



Vrijednost zikra – spominjanja Allaha (Medina)

Hatib: dr. Salah ibn Muhammed el-Budejr

9. muharrem 1447. po Hidžri / 4. juli 2025.

Hvala Allahu, Koji je visokim stepenima odlikovao one koji Ga spominju, muškarce i žene. Svjedočim da nema boga osim Allaha, Jedinog, Koji nema sudruga, i Koji je uputio Svoje odabrane robove da postižu blagodati zikra – spominjanja Njega i zahvalnosti na Njegovim velikim darovima, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, koji je jasno prenio poruku i pokazao pravi put. Neka su salavat i selam na njega, na njegovu porodicu, časne ashabe i sve one koji ih slijede u dobročinstvu do Sudnjeg dana.

O muslimani, bojte se svoga Gospodara, slijedite najljepši put i čuvajte se puteva propasti. Uzvišeni kaže: "O vjernici, bojte se Allaha onako kako se treba Njega bojati i umirite samo kao muslimani." (Ali Imran, 102)

O muslimani, spominjanje Allaha je hrana za dušu, lijek za rane, znak dobrote, uzrok smirenosti i ključ uspjeha. Uzvišeni kaže: "... i neprestano Allaha spominjite da biste postigli što želite." (El-Enfal, 45)

Ko ustraje u zikru, obasjava ga Allahova svjetlost, obasipaju ga Njegova milost i blagodati, i stalno ga prate bereketi. Zikr je najbolja opskrba, najunosnija trgovina i najteža mjera na vagi. Njegove koristi su očigledne i dostupne svakome.

Uzvišeni kaže: "Sjećajte se vi Mene, i Ja ću se vas sjetiti, i zahvaljujte Mi, i na blagodatima Mojim nemojte neblagodarni biti!" (El-Bekara, 152)

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Uzvišeni Allah kaže: 'Ja se prema Svome robu odnosim onako kako on misli o Meni. I Ja sam s njim kada Me spominje. Ako Me spomene u sebi, i Ja njega spomenem u Sebi. Ako Me spomene u društvu, i Ja njega spomenem u boljem društvu od toga.'" (Muttefekun alejhi)





Allah je Svojim robovima naredio da Ga mnogo spominju, veličaju i slave, i obećao im za to veliku nagradu i lijep povratak Njemu. Uzvišeni kaže: "O vjernici, često Allaha spominjite i hvalite, i ujutro i navečer Ga veličajte, On vas blagosilja, a i meleki Njegovi, da bi vas iz tmina na svjetlo izveo – On je prema vjernicima samilostan." (El-Ahzab, 41–43)

Abdullah ibn Busr prenosi da je jedan čovjek rekao: "O Allahov Poslaniče, mnogo je propisa islama, i ja ih ne mogu sve izvršavati, pa mi reci nešto čega ću se čvrsto držati", a Poslanik mu reče: "Neka tvoj jezik stalno bude vlažan od spominjanja Allaha."

Zato spominjite Allaha prilikom kupoprodaje, kada dajete i kada uzimate, javno i tajno, ujutro i navečer, na zemlji i pod nebom. Ibn Džabir je rekao Umejru ibn Haniju el-Abesiju ed-Daraniju: "Vidim da nikada ne prestaješ sa zikrom – koliko puta izgovoriš 'subhanallah?'", a on odgovori: "Stotinu hiljada puta, osim ako mi prsti pogriješe."

Neka vam uzori budu časni prethodnici i čuvajte se nemara i gubitka. Koliko samo na našim skupovima ima nemara, praznih riječi i beskorisnih razgovora! Koliko pričamo o dunjaluku, i opet se nikada ne umorimo i nikada nam ne dosadi takva priča. Koliko vremena trošimo na ogovaranje, prenošenje tuđih riječi i besmislene rasprave, a uskraćujemo sebi priliku da izgovorimo: "la ilahe illallah, subhanallah, elhamdulillah, Allahu ekber" – riječi zikra koje nas uzdižu i donose nam dobro.

Ebu Hurejre prenosi da je Allahov Poslanik, sallallahu alejhi ve sellem, rekao: "Nikada se ljudi neće okupiti na nekom mjestu, na kojem neće spominjati Allaha i neće donositi salavate na Poslanika, sallallahu alejhi ve sellem, a da to za njih neće biti kajanje i žalost na Sudnjem danu – pa makar ušli u Džennet zbog nagrade." (Ahmed)

Ibn Avn kazuje: "Spominjanje ljudi je bolest, a spominjanje Allaha je lijek." Imam Zehebi je rekao: "Tako mi Allaha, čudimo se sebi i svom neznanju – kako ostavljamo lijek, a prepuštamo se bolesti."





O muslimani, spominjanje Allaha jezikom, ako je praćeno čvrstom vjerom u srcu, jedno je od najboljih dobrih djela, najvrednijih ibadeta i najlakših oblika pokornosti. Ebu Derda, radijallahu anhu, prenosi da je Allahov Poslanik, sallallahu alejhi ve sellem, rekao: "Hoćete li da vas obavijestim o vašem najboljem djelu, najčišćem kod vašeg Gospodara, koje će vas uzdići na najveće stepene, i koje je bolje, za vas, od dijeljenja zlata i srebra, i susreta s neprijateljem, kada udarate njihove vratove, a oni vaše?" Prisutni rekoše: "Da, Allahov Poslaniče!", a on reče: "To je zikr – spominjanje Uzvišenog Allaha." (Tirmizi)

Aiša, radijallahu anha, prenosi da je Allahov Poslanik rekao: "Svaki čovjek, Ademov potomak, stvoren je sa tri stotine i šezdeset zglobova. Ko veliča Allaha, zahvali Mu, izgovori 'la ilahe illallah', slavi Ga, traži oprost, ukloni kamen, trn ili kost s puta koji ljudi koriste, pozove da se čini dobro ili odvрати od zla, sve to onoliko puta koliko je zglobova, on će toga dana hodati, a već se udaljio od Vatre." (Muslim)

O muslimani, zikrom – spominjanjem Allaha postiže se zadovoljstvo Milostivog, tjera šejtan, jača vjera, otklanja tuga i duši se daruje smirenost, spokoj i sigurnost. Uzvišeni kaže: "... one koji vjeruju i čija se srca, kad se Allah spomene, smiruju – a srca se doista, kad se Allah spomene smiruju!" (Er-Ra'd, 28)

Zikr odagnava nemir i potištenost, omekšava okorjela srca, otklanja nemar, liječi srca i zbog njega se spušta Allahova milost. Ebu Derda je rekao: "Za svaku stvar postoji određeni način čišćenja, a srca se čiste spominjanjem Uzvišenog Allaha."

Zikr je spas za žedne duše, hrana za prazna srca i svjetlo na trnovitim putevima. Njime se priskrbuju blagodati i blagoslovi, otklanjaju nevolje i nesreće i ublažavaju najteža iskušenja. Ni u jednom iskušenju nije spomenuto Allahovo ime a da nije postalo podnošljivije, niti u jednoj tjeskobi a da nije nestala.

O muslimani, nagrade za zikr su velike, jezik ih ne može opisati, niti ih čovjek svojim razumom može obujmiti. Sa'd ibn Ebu Vekkas, radijallahu anhu, kazuje: "Bili smo kod Allahovog Poslanika, pa reče: 'Zar neko od vas nije u stanju da svaki dan zaradi hiljadu dobrih djela?' Jedan od prisutnih upita: 'Kako da zaradi hiljadu dobrih djela?'





a on reče: 'Ako izgovori stotinu puta 'subhanallah', bit će mu upisano hiljadu dobrih djela ili će mu biti izbrisano hiljadu grijeha.'" (Muslim)

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ko kaže: 'La ilahe illallah, vahdehu la šerike leh, lehul-mulku ve lehul-hamdu ve huve ala kulli šej'in kadir!' – stotinu puta u danu, imat će nagradu kao da je oslobodio deset robova, bit će mu upisano stotinu dobrih djela i izbrisano stotinu grijeha, i bit će mu zaštita od šejtana toga dana do večeri. Niko neće doći s boljim od toga, osim onaj koji to izgovori više puta od njega." Također je rekao: "Ko izgovori: 'Subhanallahi ve bi hamdihi!', stotinu puta u danu, bit će mu oprošteni grijesi, makar ih bilo poput morske pjene." (Muttefekun alejhi)

Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: "Ko poslije svakog namaza trideset tri puta izgovori 'subhanallah', trideset tri puta 'elhamdulillah' i trideset tri puta 'Allahu ekber', a zatim zaokruži stotinu riječima: 'La ilahe illallah, vahdehu la šerike leh, lehul-mulku ve lehul-hamdu ve huve ala kulli šej'in kadir!', bit će mu oprošteni grijesi, makar ih bilo poput morske pjene." (Muslim)

Zato se u različitim životnim situacijama držite propisanih dova i zikrova i mnogo spominjite Allaha u svakom vremenu i stanju.

O muslimani, bojte se Allaha, budite svjesni Njegove prisutnosti, pokoravajte Mu se i ne griješite, jer Uzvišeni kaže: "O vjernici, bojte se Allaha i budite s onima koji su iskreni" (Et-Tevba, 119).

O muslimani, zikr je zaštita domova od nepokornih džina i šejtana. Ne lišavajte svoje kuće spominjanja Allaha i pokornosti Njemu. Ebu Musa el-Eš'ari prenosi da je Poslanik, sallallahu alejhi ve sellem, rekao: "Primjer kuće u kojoj se spominje Allah i kuće u kojoj se ne spominje je kao primjer živog i mrtvog." (Muslim)

Imam Nevevi rekao je: "Ovaj hadis ukazuje na preporučenost zikra u kući i da nijedna kuća ne bi ne trebala biti bez zikra – spominjanja Allaha."

Džabir, radijallahu anhu, prenosi da je Poslanik rekao: "Kada čovjek uđe u svoju kuću i spomene Allaha prilikom ulaska i prilikom jela, šejtan kaže (drugim šejtanima):





‘Nema vam prenoćišta ni večere.’ A ako ne spomene Allaha prilikom ulaska, šejtan kaže: ‘Imate gdje prenoćiti.’ A ako ne spomene Allaha ni prilikom jela, kaže: ‘Imate i večeru.’” (Muslim)

Ebu Hurejra prenosi da je Poslanik rekao: “Ne pretvarajte svoje kuće u groblja. Šejtan bježi iz kuće u kojoj se uči sura El-Bekara.” (Muslim)

O muslimani, post dana Ašure je veliko dobro, dar od Allaha i prilika. To je dan kada je Allah spasio Musaa i njegov narod, a potopio faraona i njegov narod. Musa, alejhis-selam, postio je taj dan iz zahvalnosti Allahu, a i Poslanik, sallallahu alejhi ve sellem, postio ga je i naredio drugima da ga poste. Rekao je: “Za post dana Ašure, nadam se, Allah će oprostiti grijeha iz prethodne godine.” (Muslim)

Zato, ne uskraćujte sebi Allahovu milost i oprost, postite Ašuru, zajedno s danom prije ili danom poslije. Ne pretvarajte Ašuru ni u dan žalosti, ni u dan pretjerane radosti. Držite se sunneta i klonite se novotarija, jer novotarije donose samo poniženje i propast.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

